

Salah guna dadah, lelaki didenda RM2,500

MIRI: Seorang lelaki didenda RM2,500 atau sebulan penjara oleh Mahkamah Majistret atas kesalahan menggunakan dadah berbahaya tanpa kebenaran pihak berkuasa.

Mahkamah turut memerintahkan tertuduh menjalani pengawasan oleh pihak berkuasa selama tempoh dua tahun mengikut Seksyen 38B Akta Dadah Berbahaya (ADB) 1952.

Cheng Ming Juh, 51, dari Kampung Tudan, Lutong disini didapati telah menggunakan dadah berbahaya jenis Methamphetamine dan Amphetamine yang terkandung dalam Jadual Pertama ADB 1952 (Akta 234), dengan cara memasukkan dadah tersebut ke dalam tubuh badan sendiri tanpa kebenaran pihak berkuasa.

Dia didakwa melakukan kesalahan itu pada jam 4.30 petang, 24 Ogos tahun ini di pejabat Bahagian Siasatan Jenayah Narkotik Daerah Miri.

Bagi kesalahan itu, dia telah didakwa mengikut Seksyen 15 (1) (a) ADB 1952 dan dihukum di bawah Seksyen 15 (1) akta yang sama.

Jika sabit kesalahan, tertuduh boleh didenda sehingga RM5,000 atau penjara sehingga dua tahun dan serta-merta dikehendaki menjalani pengawasan oleh pegawai sebagaimana ditakrifkan di bawah Seksyen 2 Akta Penagih Dadah (Rawatan dan Pemulihan) 1983 selama tempoh tidak kurang daripada dua tahun dan tidak melebihi tiga tahun mengikut Seksyen 38B ADB 1952.

Pendakwaan dilakukan Inspektor Mudzilawati Abdul Rahman di hadapan Majistret Nazira Adlin Ahmad Khairul Razi.